

Ko te hui i Ngaruawahia i karangatia hei whakatutataki i nga whakaaro o nga iwi o te motu, hei whakangawari i nga huarahi e kotahi ai, hei whakanui i te tomokanga o te whare i ata hangaia ki nga whakairo, ki nga tukutuku, ki nga kowhaiwhai, e tohutohu mai nei nga tino tangata o te iwi pakeha kia puritia e te iwi Maori kei ngaro.

Akuanei ko te mahara i nga pakeha i whakahe ra, he pai te hui mehemea na te pakeha i karanga, ahakoa i pau nga moni i te haerenga ki taua hui; engari ma te Maori e karanga kaore e kore he hui take kore, mounou kai, mounou moni.

Pakeha! Pakeha!

TE PIHOPA O AOTEAROA KIA NGATI RAUKAWA.

No te 20 onga ra o Aperira ka huri, i u mai ai te Pihopa o Aotearoa kia Ngati Raukawa, ki Otaki. I tamene mai te tangata. Ko nga taka-hoa o te Pihopa, ko te Pihopa o Poneke, ko Kenana Wiremu, Rev Renata. Mr Wills mahita Timuaki Otaki Kareti, me nga hoa Pakeha rangatira.

I takoto he matua powhiri ma Ngati Raukawa i te manuhiri tuarangi: "Haere mai te Pihopa o Aotearoa, na taku mana koe i tiki atu ki te tahatu-o-te-rangi, etc." Ka tuaruatia: "Toia mai te waka, etc." Ka tau hoki te ope ki te marae ki Raukawa.

Na Rev Te Muera Tokoaitua i wawae te whai-korero ma te tangata whenua. I muri iho ko Rawiri Te Tahiwī, ko Rere Neketini, ko Kipa Roa.

I whakauru ki nga kupu powhiri, manaaki a nga rangatira o te tangata whenua enei kupu e whai ake nei: "Haere mai to matou matua te Pihopa o Poneke. Haere mai, mauria mai to tamaiti te Pihopa Maori. He nui whakaharahara to matou koa, i to taenga a-tinana mai, koutou ko ou hoa me te Pihopa o Aotearoa. Mauria mai te Pihopa Maori ki tona temepara ki Rangiatea. Na ona koroua me ona kuia i hanga tenei temepara mona. Ahakoa kua hamate ratou, ko nga wairua kei te ora. No tenei ra ka kitea kaore i maumau to ratou muiuitanga i roto i te Ariki. Haere mai e tama, te Pihopa o Aotearoa, haere mai ra! Haere mai ki runga i ou iwi. Haere mai kia Ngati Raukawa haere ake. Ka pai, ka tinana i a koe te koingo a te matua-a-iwi ka ngaro ki te po. Whakatereta to waka. Akiakina kia rite te rau o te hoe. Ma te Atua koe, tatou tahi e awihina."

NGA TAKE KI TE PIHOPA O PONEKE

Na Kipa Roera i whakapuaki nga take a Ngati Raukawa: